

সমাজকল্যাণ মন্ত্রণালয়  
আইন, সংস্থা ও রেজিস্ট্রেশন অধিশাখা

বিষয়: সেচ্ছাসেবী সমাজকল্যাণ সংস্থা (রেজিস্ট্রেশন ও নিয়ন্ত্রণ) আইন, ২০১৭ এর খসড়া ওয়েবসাইটে আপলোড করা প্রসঙ্গে।

উপর্যুক্ত বিষয়ের প্রেক্ষিতে জানানো যাচ্ছে যে, সমাজকল্যাণ মন্ত্রণালয়ের আইন ও সংস্থা অধিশাখার সেচ্ছাসেবী সমাজকল্যাণ সংস্থা (রেজিস্ট্রেশন ও নিয়ন্ত্রণ) আইন, ২০১৭ এর প্রস্তুতকৃত খসড়াটি জনমত যাচাইয়ের জন্য সমাজকল্যাণ মন্ত্রণালয়ের ওয়েবসাইটে আপলোড করে ১৫ দিনের মধ্যে সর্বসাধারণের মতামত আহবানের প্রয়োজনীয় ব্যবস্থা গ্রহণের জন্য নির্দেশক্রমে অনুরোধ করা হলো।

সংযুক্ত: ০৯ (নয়) পাতা।

৩/৫/১৭

যুগ্মসচিব (আইসিটি)  
সমাজকল্যাণ মন্ত্রণালয়  
বাংলাদেশ সচিবালয়, ঢাকা।

ইউ. ও. নোট নং-৪১.০০.০০০০.০৫২.০১.০০২.১৫-১১০

  
মোহাম্মদ নূরুল ইসলাম  
উপসচিব

আইন, সংস্থা ও রেজিস্ট্রেশন অধিশাখা  
ফোন: ৯৫৪৯০৪০

১১ আশ্বিন ১৪২৪

২৬ সেপ্টেম্বর ২০১৭

গণপ্রজাতন্ত্রী বাংলাদেশ সরকার  
সমাজকল্যাণ মন্ত্রণালয়

বিল নং-----, ২০১৭

স্বৈচ্ছাসেবী সমাজকল্যাণ সংস্থা নিবন্ধন ও নিয়ন্ত্রণ- সংক্রান্ত বিদ্যমান অধ্যাদেশ রহিতপূর্বক সংশোধনসহ উহা পুনঃপ্রণয়ন ও সংহত  
করিবার নিমিত্ত আনীত

বিল

যেহেতু দীর্ঘদিনের পুরাতন 'স্বৈচ্ছাসেবী সমাজকল্যাণ সংস্থাসমূহ (রেজিস্ট্রেশন ও নিয়ন্ত্রণ) অধ্যাদেশ, ১৯৬১' রহিতপূর্বক উহার  
পুনঃপ্রণয়ন করিবার লক্ষ্যে একটি নূতন আইন প্রণয়ন করা সমীচীন ও প্রয়োজনীয়

সেইহেতু, এতদ্বারা নিম্নরূপ আইন প্রণয়ন করা হইল-

- ১। সংক্ষিপ্ত শিরোনাম, প্রবর্তন ও প্রয়োগ- (১) এই আইন 'স্বৈচ্ছাসেবী সমাজকল্যাণ সংস্থা (নিবন্ধন ও নিয়ন্ত্রণ) আইন, ২০১৭'  
নামে অভিহিত হইবে;  
(২) ইহা অবিলম্বে কার্যকর হইবে; এবং  
(৩) ইহা সমগ্র বাংলাদেশে প্রযোজ্য হইবে।
- ২। সংজ্ঞার্থ- বিষয় বা প্রসঙ্গের পরিপন্থি কোনো কিছু না থাকিলে এই আইনে নিম্নরূপ বুঝাইবে-
  - (১) 'অডিটর' অর্থ বাংলাদেশ চার্টারড একাউন্ট্যান্টস্ অর্ডার (১৯৭৩ সনের ২নং রাষ্ট্রপতির আদেশ) অনুযায়ী অডিট  
ফর্ম;
  - (২) 'অনুদান বা চাঁদা' অর্থ ব্যক্তি, গোষ্ঠী, এজেন্সি, সংস্থা, সংবিধিবদ্ধ সংস্থা/ব্যাবসায়িক প্রতিষ্ঠান কর্তৃক এই  
আইনের অধীন সমাজকল্যাণ এবং উন্নয়ন কর্মকাণ্ড পরিচালনার উদ্দেশ্যে প্রদত্ত নগদ বা অন্য কোনোভাবে প্রদত্ত  
চাঁদা বা অনুদান বা সরকার কর্তৃক প্রদত্ত অনুদান;
  - (৩) 'অলাভজনক প্রতিষ্ঠান' অর্থ কোনো সংস্থা, যাহার কোনো আয় সংস্থার সদস্য বা অন্য কাহারও মধ্যে বিতরণ  
করা যাইবে না। উক্ত আয় কেবল সমাজকল্যাণ এবং উন্নয়নমূলক কর্মকাণ্ডে ব্যয় করা যাইবে;
  - (৪) 'কার্যনির্বাহী পরিষদ' অর্থ এই আইনে নিবন্ধিত কোনো সংস্থা/প্রতিষ্ঠানের সাধারণ সদস্য দ্বারা নির্বাচিত  
পরিচালনা পর্ষদ;
  - (৫) 'কার্যক্রম' অর্থ এই আইনের তপশিলে বর্ণিত কার্যক্রম;
  - (৬) 'গঠনতন্ত্র' অর্থ সংস্থার গঠনতন্ত্র যাহা নিবন্ধন কর্তৃপক্ষ কর্তৃক অনুমোদিত;
  - (৭) 'তপশিল' অর্থ এই আইনের তপশিল;
  - (৮) 'ধারা' অর্থ এই আইনের কোনো ধারা;
  - (৯) 'নির্ধারিত' অর্থ ধারা ২৭ অনুযায়ী প্রণীত বিধি দ্বারা নির্ধারিত;
  - (১০) 'নিবন্ধন কর্তৃপক্ষ' অর্থ সরকার কর্তৃক সরকারি গেজেটে প্রজ্ঞাপন দ্বারা ক্ষমতাপ্রাপ্ত কোনো কর্মকর্তা;
  - (১১) 'নিবন্ধিত' অর্থ এই আইনের অধীন নিবন্ধিত;
  - (১২) 'বিধি' অর্থ এই আইনের ধারা ২৭- এর অধীনে সরকার কর্তৃক প্রণীত বিধি;
  - (১৩) 'বেসরকারি সংস্থা বা Non-Government Organisation (NGO)' অর্থ বাংলাদেশের অভ্যন্তরে  
স্বৈচ্ছাসেবামূলক কার্যক্রম পরিচালনা করিবার উদ্দেশ্যে এনজিও ব্যুরো কর্তৃক নিবন্ধিত কোনো সংস্থা এবং  
কোনো বিদেশি রাষ্ট্রের প্রচলিত আইনের অধীন নিবন্ধিত কোনো সংস্থা বা এনজিও ব্যুরোর অধীনে নিবন্ধিত বা ইহার  
অন্তর্ভুক্ত;
  - (১৪) 'মহাপরিচালক' অর্থ সমাজসেবা অধিদফতরের মহাপরিচালক;

- ৪৩০
- (১৫) 'রাষ্ট্র মালিকানাধীন বাণিজ্যিক ব্যাংক' অর্থ Bangladesh Bank Order, 1972 (P. O. No. 127 of 1972) এর Article 2(J) অনুযায়ী রাষ্ট্র মালিকানাধীন বাণিজ্যিক ব্যাংক;
- (১৬) 'রেজিস্টার' অর্থ এই আইনের অধীন সংরক্ষিত রেজিস্টার;
- (১৭) 'সনদ' অর্থ নিবন্ধিত সংস্থার অনুকূলে জারিকৃত নিবন্ধন সনদ;
- (১৮) 'স্বেচ্ছাসেবী সমাজকল্যাণ সংস্থা বা Voluntary Social Welfare Organisation (VSO)' অর্থ তপশিলে বর্ণিত যে কোনো এক বা একাধিক সমাজকল্যাণ ও উন্নয়নমূলক কার্যসম্পাদনের উদ্দেশ্যে জনগণ কর্তৃক স্বেচ্ছায় প্রতিষ্ঠিত এবং জনসাধারণের চাঁদা, দান, অনুদান বা সরকারি সাহায্যের উপর নির্ভরশীল কোনো অলাভজনক, অরাজনৈতিক প্রতিষ্ঠান, সমিতি বা অনুরূপ কোনো প্রতিষ্ঠান; এবং
- (১৯) 'সংস্থা' অর্থ কোনো স্বেচ্ছাসেবী সমাজকল্যাণ সংস্থা বা উহার কোনো শাখা, যাহা সমাজের কল্যাণ এবং উন্নয়নমূলক কর্মকাণ্ডের সহিত যুক্ত।

৩। আইনের প্রাধান্য- আপাতত বলবৎ অন্য কোনো আইনে ভিন্নতর যাহা কিছুই থাকুক না কেন এই আইনের বিধানাবলি প্রাধান্য পাইবে।

- ৪। নিবন্ধন ব্যতীত কোনো সংস্থা প্রতিষ্ঠা বা অব্যাহত রাখা - (১) এই আইনের বিধানাবলি অনুসরণ ব্যতীত কোনো সংস্থা প্রতিষ্ঠা করা বা উহা অব্যাহত রাখা যাইবে না;
- (২) এই আইন কার্যকর হইবার পূর্বে 'স্বেচ্ছাসেবী সমাজকল্যাণ সংস্থাসমূহ (রেজিস্ট্রেশন ও নিয়ন্ত্রণ) অধ্যাদেশ, ১৯৬১'- এর অধীনে নিবন্ধিত সকল সংগঠনগুলি বিদ্যমান বলিয়া গণ্য হইবে;
- (৩) পূর্ব হইতে বিদ্যমান কোনো সংস্থা এই আইন কার্যকর হইবার তারিখ হইতে ১ (এক) বৎসরের অধিককাল চালু রাখা যাইবে না, যদি না উক্ত তারিখ হইতে ৩০ (ত্রিশ) দিবসের মধ্যে ধারা ৫- এর উপধারা (১) অনুযায়ী উহার নামের ছাড়পত্রের জন্য কোনো আবেদন করা না হইয়া থাকে।
- (৪) যেইক্ষেত্রে কোনো বিদ্যমান সংস্থা সম্পর্কে ধারা ৬- এর উপধারা (১) অনুযায়ী আবেদন করা হইয়াছে এবং ধারা ৬- এর উপধারা (২) অনুযায়ী উক্ত আবেদন প্রত্যাখ্যান করা হইয়াছে, সেইক্ষেত্রে উপধারা (৩) এ বর্ণিত ১ (এক) বৎসর সময়ের ব্যবস্থা থাকা সত্ত্বেও, আবেদনটি প্রত্যাখ্যান করিবার তারিখ হইতে ৩০ (ত্রিশ) দিবস পর্যন্ত, অথবা ধারা ২১- এর অধীন আপিল নিষ্পত্তি না হওয়া পর্যন্ত সংস্থাটি চালু রাখা যাইবে।

- ৫। নামের ছাড়পত্র গ্রহণ-(১) কোনো ব্যক্তি বা সমষ্টি কোনো সংস্থা প্রতিষ্ঠা করিতে চাহিলে বা কোনো ব্যক্তি বা সমষ্টি পূর্বে প্রতিষ্ঠিত অনুরূপ কোনো সংস্থা চালু রাখিতে ইচ্ছা করিলে তাহাকে বা তাহাদেরকে নির্ধারিত পদ্ধতিতে নামের ছাড়পত্র গ্রহণের জন্য নিবন্ধন কর্তৃপক্ষ বরাবর আবেদন করিতে হইবে;
- (২) আবেদনকৃত নামে অনুরূপ কোনো সংস্থা ইতঃপূর্বে নিবন্ধিত হইয়াছে কি না, নিবন্ধন কর্তৃপক্ষ তাহা যথাযথভাবে যাচাই-বাছাই করিয়া, নিশ্চিত হইয়া, তাহার সন্তুষ্টিক্রমে আবেদনকারী ব্যক্তি বা সমষ্টির অনুকূলে একটি নাম নির্দিষ্টকরণপূর্বক নির্ধারিত পদ্ধতিতে নামের ছাড়পত্র প্রদান করিবেন;
- (৩) কোনো নামের ছাড়পত্র দেওয়া হইবে না, যদি--
- (ক) উহার ব্যবহার প্রতারণামূলক হইতে পারে বা বিভ্রান্তির সৃষ্টি করিতে পারে;
- (খ) উপযুক্ত কর্তৃপক্ষ বা ব্যক্তির অনুমতি ব্যতীত, কোনো দেশ বা আন্তর্জাতিক সংস্থা বা আন্তর্জাতিক চুক্তি বা কনভেনশনের মাধ্যমে গঠিত কোনো সংস্থা বা অফিসের নাম, নামের আদ্যাক্ষর বা উহার সহিত সামঞ্জস্যপূর্ণ বা আংশিক সামঞ্জস্যপূর্ণ অংশবিশেষ ব্যবহার করা হয়; এবং
- (গ) উক্ত নামে কোনো সংস্থা গত ছয় মাস কার্যকর থাকে।
- (৪) কোনো সরকারি বা আধাসরকারি বা স্বায়ত্বশাসিত, স্থানীয় সরকার ইত্যাদি প্রতিষ্ঠানের নামের সহিত যদি কোনো সংস্থার নাম সামঞ্জস্যপূর্ণ বা আংশিক সামঞ্জস্যপূর্ণ হইয়া থাকে, তবে নিবন্ধন কর্তৃপক্ষ উক্ত সংস্থার নামের ছাড়পত্র বাতিল করিতে পারিবে। উক্ত সংস্থাকে ধারা ৫ (১) অনুযায়ী নূতন নামের ছাড়পত্র গ্রহণ করিতে হইবে।

৬। নিবন্ধনের জন্য আবেদন-(১) ধারা ৫- এর বিধান অনুযায়ী কোনো ব্যক্তি বা সমষ্টি নামের ছাড়পত্র প্রাপ্ত হইলে, তাহাকে নির্ধারিত ফিস এবং মূল্য সংযোজন কর বিধিমালা, ১৯৯১- এর বিধি ১৮ (আ) অনুযায়ী নিবন্ধন ফি আদায়ের সময় প্রযোজ্য হারে মুসক কর্তন ও কর্তনকৃত মুসক যথাযথ কোডে সরকারি ট্রেজারিতে জমা প্রদান করিয়া নির্ধারিত পদ্ধতিতে নিবন্ধন কর্তৃপক্ষের নিকট নিবন্ধনের

জন্য আবেদন করিতে হইবে;

- (২) নিবন্ধন কর্তৃপক্ষ আবেদন পাইবার পর নির্ধারিত পদ্ধতিতে প্রয়োজনীয় তদন্ত অনুষ্ঠান সম্পন্ন করিয়া আবেদন প্রাপ্তির ৯০ (নব্বই) দিবসের মধ্যে উহা মঞ্জুর করিবেন অথবা নামঞ্জুরের কারণ উল্লেখপূর্বক উক্ত সিদ্ধান্ত আবেদনকারী ব্যক্তি বা সমষ্টিকে নির্ধারিত পদ্ধতিতে অবহিত করিবেন;
- (৩) নিবন্ধন কর্তৃপক্ষ আবেদন মঞ্জুর করিলে আবেদনকারীকে নির্ধারিত পদ্ধতিতে ক্রমিকসহ (নিবন্ধন নম্বর) একটি নিবন্ধন সনদ প্রদান করিবেন।
- (৪) নিবন্ধন কর্তৃপক্ষ উপধারা (৩)- এর অধীন প্রদত্ত সনদ সম্পর্কে নির্ধারিত পদ্ধতিতে একটি রেজিস্টার সংরক্ষণ করিবেন।

৭। অন্য কোনো আইনের আওতায় নিবন্ধিত সংস্থার নিবন্ধন নিষিদ্ধ- অন্য কোন আইনের আওতায় নিবন্ধিত কোনো সংস্থা বা প্রতিষ্ঠানকে এই আইনের আওতায় নিবন্ধন করা যাইবে না;

৮। নিবন্ধিত সংস্থার গঠনতন্ত্র ও উহার সংশোধন ইত্যাদি- (১) এই আইনের অধীন নিবন্ধিত সংস্থার একটি গঠনতন্ত্র থাকিবে, যাহা নিবন্ধন কর্তৃপক্ষ কর্তৃক অনুমোদিত হইবে;

- (২) নিবন্ধনের জন্য আবেদনের সময় নির্ধারিত ফরমে গঠনতন্ত্রের খসড়া প্রণয়ন করিয়া নিবন্ধন কর্তৃপক্ষের নিকট পেশ করিতে হইবে;
- (৩) নিবন্ধন কর্তৃপক্ষ ধারা ৬- এর উপধারা (৩) অনুযায়ী নিবন্ধন সনদ প্রদানের সময় অনুমোদিত গঠনতন্ত্রের অনুলিপি আবেদনকারীকে প্রদান করিবেন; এবং
- (৪) নির্ধারিত পদ্ধতিতে নিবন্ধন কর্তৃপক্ষের অনুমোদন ব্যতীত নিবন্ধিত সংস্থার গঠনতন্ত্রের কোনো সংশোধনই বৈধ বলিয়া গণ্য হইবে না।

৯। কার্যনির্বাহী পরিষদ গঠন ও অনুমোদন ইত্যাদি- (১) প্রত্যেকটি নিবন্ধিত সংস্থার কার্যনির্বাহী পরিষদ নির্ধারিত পদ্ধতি এবং সংস্থার অনুমোদিত গঠনতন্ত্র-অনুযায়ী সাধারণ সদস্যগণ দ্বারা গঠিত হইবে;

- (২) কার্যনির্বাহী পরিষদ গঠনের পর নির্ধারিত পদ্ধতিতে নিবন্ধন কর্তৃপক্ষের অনুমোদন গ্রহণ করিতে হইবে; এবং
- (৩) নিবন্ধন কর্তৃপক্ষের অনুমোদন ব্যতীত কার্যনির্বাহী পরিষদ কার্যকর হইবে না।

১০। কার্য এলাকা সম্প্রসারণ-(১) এই আইনের অধীন নিবন্ধনের সময় সংস্থার কার্য এলাকা নির্ধারণ করিতে হইবে এবং প্রাথমিকভাবে ১ (এক) টি জেলার বেশি কার্য এলাকা নির্ধারণ করা যাইবে না;

- (২) নিবন্ধিত সংস্থা নিবন্ধনের সময় নির্দিষ্টকৃত কার্য এলাকার বাহিরে কার্যক্রম সম্প্রসারণ করিতে পারিবে না;
- (৩) সংস্থা নিবন্ধনের পর নির্ধারিত পদ্ধতিতে একবারে অনধিক ৫ (পাঁচ) জেলায় কার্য এলাকা সম্প্রসারণের জন্য নির্ধারিত ফি প্রদান করিয়া নির্ধারিত পদ্ধতিতে মহাপরিচালক বরাবরে আবেদন করা যাইবে; এবং
- (৪) মহাপরিচালক উপধারা (৩)- এর অধীন আবেদন প্রাপ্তির পর প্রয়োজনে তদন্ত অনুষ্ঠানপূর্বক নির্ধারিত পদ্ধতিতে কার্য এলাকা সম্প্রসারণের অনুমতি প্রদান করিতে পারিবেন অথবা আবেদন প্রত্যাখান করিতে পারিবেন।  
তবে শর্ত থাকে যে, আবেদন প্রত্যাখানের বিষয়ে নির্ধারিত পদ্ধতিতে আবেদনকারী সংস্থাকে অবহিত করিতে হইবে।

১১। নিবন্ধন নবায়ন- (১) আপাতত বলবৎ অন্য কোনো আইনে যাহা কিছুই থাকুক না কেন,-

- (ক) এই আইনের অধীন নিবন্ধিত সংস্থা নিবন্ধনের তারিখ হইতে প্রতি ৫ (পাঁচ) বৎসর অন্তর নির্ধারিত ফি প্রদান করিয়া নির্ধারিত পদ্ধতিতে উহার নিবন্ধন নবায়ন করিবে;
- (খ) নিবন্ধন প্রাপ্তির ৫ (পাঁচ) বৎসর অতিক্রান্ত হইবার অন্তর ৩ (তিন) মাস পূর্বে নিবন্ধন নবায়নের জন্য নির্ধারিত পদ্ধতিতে নিবন্ধন কর্তৃপক্ষ বরাবরে আবেদন করিতে হইবে;
- (গ) নিবন্ধন কর্তৃপক্ষ আবেদন পত্র প্রাপ্তির পর নির্ধারিত পদ্ধতিতে যাচাই-বাছাই এবং প্রয়োজনে তদন্ত সম্পন্ন করিয়া নিবন্ধন নবায়ন মঞ্জুর কবিবেন বা সংগত কারণ লিপিবদ্ধ করিয়া আবেদন প্রত্যাখান করিতে পারিবেন :  
তবে শর্ত থাকে যে, নবায়ন আদেশ প্রত্যাখানের বিষয়ে আবেদনকারী সংস্থাকে নির্ধারিত পদ্ধতিতে অবহিত করিতে হইবে;

- (ঘ) নিবন্ধন কর্তৃপক্ষ নবায়ন আবেদন মঞ্জুর করিলে আবেদনকারী সংস্থাকে নির্ধারিত পদ্ধতিতে নিবন্ধন নবায়ন সনদ প্রদান করিবেন এবং নবায়ন সম্পর্কিত তথ্য ধারা ৬- এর উপধারা (৪)- এ বর্ণিত রেজিস্টারে সংরক্ষণ করিবেন;

- (ঙ) নির্ধারিত সময়ের মধ্যে কোনো সংস্থা নিবন্ধন নবায়ন করিতে ব্যর্থ হইলে বা নবায়ন আবেদন প্রত্যাখান করা হইলে নিবন্ধন কর্তৃপক্ষ সংস্থাটির নিবন্ধন বাতিল করিয়া আনুষ্ঠানিক আদেশ জারি করিবেন এবং আদেশ জারির তারিখ হইতে সংস্থাটির বিলুপ্তি ঘটবে;
- (চ) দফা (ঙ) অনুযায়ী বিলুপ্তির পর নিবন্ধন কর্তৃপক্ষ নির্ধারিত পদ্ধতিতে সংস্থার দায়-দেনা নির্ধারণ করিয়া ধারা ২০-অনুযায়ী পদক্ষেপ গ্রহণের জন্য মহাপরিচালককে অনুরোধ করিবেন;
- (ছ) নিবন্ধন নবায়ন ব্যতীত সংস্থার কার্যক্রম পরিচালনা করা হইলে ধারা ২২ অনুযায়ী শাস্তিযোগ্য অপরাধ বলিয়া গণ্য হইবে; এবং

- (২) বিদ্যমান আইনে নিবন্ধিত যেইসকল সংস্থার নিবন্ধনের মেয়াদ এই আইন কার্যকর হইবার তারিখে ৫ (পাঁচ) বৎসর পূর্ণ হইয়াছে বা পরবর্তীকালে ৫ (পাঁচ) বৎসর পূর্ণ হইবে সেইসকল সংস্থার নিবন্ধন উপধারা (১) অনুযায়ী নবায়ন করিতে হইবে;
- (৩) নিবন্ধন নবায়নের আবেদন নিষ্পত্তি না হওয়া পর্যন্ত সংস্থার নিবন্ধন বহাল থাকিবে।

১২। সংস্থার নাম পরিবর্তন বা সংশোধন কিংবা একীভূতকরণ- (১) নির্ধারিত পদ্ধতিতে নিবন্ধন কর্তৃপক্ষের অনুমোদনসাপেক্ষে সংস্থার সাধারণ সভায় সংস্থার দুই-তৃতীয়াংশ সদস্যের সম্মতিতে গৃহীত সিদ্ধান্তের মাধ্যমে উহার নাম পরিবর্তন বা সংশোধন করিতে পারিবে; এবং

- (২) কোনো সংগঠনের নামের পরিবর্তন বা সংশোধন উহার পক্ষে বা বিপক্ষে পরিচালিত কোনো আইনগত মামলায় উক্ত সংগঠনের অধিকার বা দায়-দায়িত্বের উপর কোনো প্রভাব ফেলিবে না।
- (৩) নির্ধারিত পদ্ধতিতে নিবন্ধন কর্তৃপক্ষের অনুমোদনক্রমে দুই বা ততোধিক সংস্থা একীভূত করা যাইবে।

১৩। নিবন্ধন কর্তৃপক্ষের দায়িত্ব ও কার্যাবলি- নিবন্ধন কর্তৃপক্ষের দায়িত্ব ও কার্যাবলি নিম্নরূপ হইবে, যথা :-

- (ক) তপশিল এ বর্ণিত কার্যক্রম পরিচালনার উদ্দেশ্যে ধারা ৬ এর উপধারা (৩) অনুযায়ী সংস্থার নিবন্ধন সনদ প্রদান এবং ক্ষেত্রমত নিবন্ধন বাতিলের সুপারিশকরণ;
- (খ) সংস্থার কার্য এলাকা নির্ধারণ;
- (গ) সংস্থার গঠনতন্ত্র অনুমোদন ও সংশোধন;
- (ঘ) লিয়াজেঁ অফিস ও শাখা অফিস খোলার অনুমতি প্রদান, ক্ষেত্রমত, সুপারিশকরণ;
- (ঙ) কার্য এলাকা সম্প্রসারণের সুপারিশকরণ;
- (চ) কার্যনির্বাহী পরিষদ অনুমোদন;
- (ছ) নিবন্ধন নবায়ন;
- (জ) সংস্থার বিরুদ্ধে প্রাপ্ত অভিযোগ তদন্তকরণ ও যথাযথ ব্যবস্থা গ্রহণ, ক্ষেত্রমত, সুপারিশকরণ;
- (ঝ) সংস্থার কার্যক্রম তত্ত্বাবধান (Supervision), পরিদর্শন, পরিবীক্ষন (Monitoring) ও নিয়ন্ত্রণ (Regulation), ক্ষেত্রমত, হিসাব নিরীক্ষণ;
- (ঞ) সংস্থা একীভূতকরণ;
- (ট) মহাপরিচালক বরাবর নির্ধারিত পদ্ধতিতে মাসিক প্রতিবেদন প্রেরণ;
- (ঠ) উপরি-উক্ত বিষয়াদি সংক্রান্ত তথ্য সংরক্ষণ, বিশ্লেষণ, সরেজমিন পরিদর্শন ও যথাযথ ব্যবস্থা গ্রহণ;
- (ড) প্রশাসক নিয়োগ বা তত্ত্বাবধায়ক পরিষদ গঠন;
- (ঢ) উপরি-উক্ত দায়িত্ব ও কর্তব্যসমূহ সম্পাদনের জন্য যে-কোনো পদক্ষেপ গ্রহণ; এবং
- (ণ) নির্ধারিত ও সরকার কর্তৃক সময়ে সময়ে জারিকৃত প্রশাসনিক আদেশ দ্বারা নির্দেশিত অন্যান্য দায়িত্ব পালন।

১৪। সংস্থার পালনীয় শর্তাবলি- (১) নিবন্ধিত সংস্থা কর্তৃক পালনীয় শর্তাবলি নিম্নরূপ হইবে, যথা :-

- (ক) নির্ধারিত পদ্ধতিতে বাৎসরিক কর্মপরিকল্পনা ও কার্যক্রম প্রতিবেদন প্রণয়ন, হিসাব নিরীক্ষাকরণ, সংরক্ষণ, নিবন্ধন কর্তৃপক্ষ বরাবর প্রেরণ এবং সর্বসাধারণের অবগতির জন্য প্রকাশ;
- (খ) নিবন্ধন কর্তৃপক্ষের অনুমতিসাপেক্ষে কোনো রাষ্ট্র মালিকানাধীন বাণিজ্যিক ব্যাংকে সংস্থার নামে খোলা এক বা একাধিক হিসাবের মাধ্যমে সকল আর্থিক লেনদেন সম্পাদন;

তবে শর্ত থাকে যে, নিবন্ধন প্রাপ্তির পরে সংশ্লিষ্ট ব্যাংক প্রদত্ত ব্যাংক হিসাবের ত্রৈমাসিক হিসাব-বিবরণী (Bank Statement) নিবন্ধিত সংস্থা কর্তৃক স্থানীয় সমাজসেবা কার্যালয় এবং নিবন্ধন কর্তৃপক্ষ বরাবর প্রেরণ;

- (গ) নির্ধারিত পদ্ধতিতে কার্যনির্বাহী পরিষদের অনুমোদন গ্রহণ; এবং

(ঘ) নির্ধারিত পদ্ধতিতে সংস্থার বিভিন্ন রেজিস্টার সংরক্ষণ।

(২) নির্ধারিত এবং সরকার কর্তৃক সময়ে সময়ে নির্দেশিত অন্যান্য শর্তাবলি।

১৫। দলিলপত্র দর্শন ও প্রতিলিপি সংগ্রহ-নিবন্ধন কর্তৃপক্ষের বিবেচনায় গোপনীয় বা জনস্বার্থে অন্যদের জানানো সমীচীন নহে, এইরূপ ব্যতীত নিবন্ধিত সংস্থার যে-কোনো দলিল, নির্ধারিত ফি প্রদান করিয়া নিবন্ধন কর্তৃপক্ষের অনুমতিসাপেক্ষে, যে-কোন ব্যক্তি উহা দর্শন বা উহার প্রতিলিপি বা অংশ বিশেষ সত্যায়িত আকারে সংগ্রহ করিতে পারিবেন।

১৬। কার্যনির্বাহী পরিষদ বরখাস্তকরণ অথবা নিবন্ধিত সংস্থার কার্যাবলী স্থগিতকরণ-(১) যদি নিবন্ধন কর্তৃপক্ষ নিশ্চিত হন যে, কোনো নিবন্ধিত সংস্থা উহার তহবিল সংক্রান্ত কোনো অনিয়মের জন্য বা উহার কর্মকাণ্ড পরিচালনার অব্যবস্থাপনার জন্য দায়ী বা উক্ত সংস্থা এই আইনের বিধান বা তদধীন প্রণীত বিধি বা উহার গঠনতন্ত্র বা এতদ্বিষয়ে জারিকৃত সরকারি আদেশাবলি পরিপালনে ব্যর্থ হইয়াছে বা কোনো সংস্থা প্রত্যক্ষ বা পরোক্ষভাবে কোনো রাজনৈতিক কর্মকাণ্ডের সহিত জড়িত হইয়াছে, বা দেশের সংবিধান বা প্রচলিত আইনের পরিপন্থি কর্মকাণ্ডে লিপ্ত হইয়াছে, তাহা হইলে নিবন্ধন কর্তৃপক্ষ লিখিত আদেশ দ্বারা উক্ত সংস্থার কার্যনির্বাহী পরিষদ বা কার্যনির্বাহী পরিষদের কোনো সদস্য বা সুনির্দিষ্টভাবে দায়ী সংস্থার কোনো সদস্যকে কারণ দর্শানোর সুযোগ প্রদান করিয়া বরখাস্ত করিতে বা সংস্থা কর্তৃক পরিচালিত এক বা একাধিক কর্মকাণ্ড স্থগিত করিতে পারিবেন।

(২) উপধারা (১)- এর অধীন কোনো সংস্থার কার্যনির্বাহী পরিষদ বরখাস্ত করা হইলে, নিবন্ধন কর্তৃপক্ষ একজন প্রশাসক নিয়োগ করিবেন বা অনধিক ৫ (পাঁচ) সদস্য সমন্বয়ে একটি তত্ত্বাবধায়ক পরিষদ গঠন করিবেন এবং উক্ত প্রশাসক বা, ক্ষেত্রমত, তত্ত্বাবধায়ক পরিষদ সংস্থার গঠনতন্ত্র-অনুযায়ী নির্বাহী কমিটির ন্যায় সমস্ত ক্ষমতা প্রয়োগের অধিকারী হইবেন।

(৩) উপধারা (১)- এর আওতায় কোনো সংস্থার কার্যনির্বাহী পরিষদের কোনো সদস্য বা অন্য কোনো সদস্যকে বরখাস্ত করা হইলে সংস্থা প্রয়োজনবোধে উক্ত ব্যক্তির স্থলে গঠনতন্ত্র-অনুযায়ী যথাযথ প্রক্রিয়ায় অন্যকোনো সদস্যকে কো-অপ্ট করিতে এবং যথাযথ সংশোধনের মাধ্যমে এক বা একাধিক স্থগিত কর্মকাণ্ড নিবন্ধন কর্তৃপক্ষের অনুমতিসাপেক্ষে চালু করিতে পারিবে।

(৪) যে কার্যনির্বাহী পরিষদ বা সংস্থার কোনো সদস্যের বিরুদ্ধে উপধারা (১) অনুযায়ী আদেশ জারি করা হইয়াছে, সেই কার্যনির্বাহী পরিষদ বা সদস্য, আদেশ জারির তারিখ হইতে ৩০ (ত্রিশ) দিবসের মধ্যে মহাপরিচালক কর্তৃক গঠিত আপিল কমিটির নিকট আপিল করিতে পারিবে এবং আপিল কমিটি আপিল দায়েরের তারিখ হইতে ৩০ (ত্রিশ) দিবসের মধ্যে আপিল নিষ্পত্তি করিবেন। আপিল কমিটির সিদ্ধান্ত চূড়ান্ত বলিয়া গণ্য হইবে।

(৫) নিবন্ধন কর্তৃপক্ষের আদেশের তারিখ হইতে ৯০ (নব্বই) দিবসের মধ্যে বা যদি আপিল কমিটি সংস্থার কার্যনির্বাহী পরিষদ বরখাস্তকরণ বা কর্মকাণ্ড স্থগিতকরণ সংক্রান্ত নিবন্ধন কর্তৃপক্ষের আদেশ বহাল রাখেন, তাহা হইলে নিয়োগপ্রাপ্ত প্রশাসক বা তত্ত্বাবধায়ক পরিষদ আপিল কমিটি কর্তৃক গৃহীত সিদ্ধান্ত প্রদানের তারিখ হইতে ৯০ (নব্বই) দিবসের মধ্যে সংস্থার গঠনতন্ত্র-অনুযায়ী নির্বাচনের মাধ্যমে কার্যনির্বাহী পরিষদ গঠনের ব্যবস্থা করিবেন।

(৬) যদি প্রশাসক বা তত্ত্বাবধায়ক পরিষদ নির্দিষ্ট সময়ের মধ্যে সংস্থার কার্যনির্বাহী পরিষদ গঠনে ব্যর্থ হন, তবে ব্যর্থতার কারণ ব্যাখ্যা করিয়া প্রশাসক বা তত্ত্বাবধায়ক পরিষদ কর্তৃক নিবন্ধন কর্তৃপক্ষের নিকট প্রতিবেদন পেশ করিতে হইবে। নিবন্ধন কর্তৃপক্ষ প্রদত্ত প্রতিবেদন যথাযথ বিবেচনা করিলে প্রশাসক বা তত্ত্বাবধায়ক পরিষদের মেয়াদ পুনরায় যুক্তিসংগত সময় পর্যন্ত বৃদ্ধি করিতে বা নতুন প্রশাসক বা তত্ত্বাবধায়ক পরিষদ নিয়োগ/গঠন করিতে পারিবেন।

১৭। নিবন্ধিত সংস্থার নিবন্ধন বাতিল ও সংস্থার বিলুপ্তি-(১) যদি নিবন্ধন কর্তৃপক্ষের এইরূপ বিশ্বাস করিবার যুক্তিসংগত কারণ থাকে যে, কোনো নিবন্ধিত সংস্থা উহার গঠনতন্ত্র বিরোধী বা এই আইনের বিধানাবলি বা আইনের অধীন প্রণীত বিধিসমূহের পরিপন্থি বা জনগণের স্বার্থ বিরোধী বা রাষ্ট্রবিরোধী বা দেশের সংবিধান বা প্রচলিত আইনের পরিপন্থি কোনো কার্য করিতেছে, তাহা হইলে নিবন্ধন কর্তৃপক্ষ উক্ত সংস্থাকে নিজ বিবেচনায় সংগতকারণ দর্শানোর সুযোগ প্রদান করিয়া, যথাযথ কর্তৃপক্ষের মাধ্যমে সরকারের নিকট তৎসম্পর্কে একটি প্রতিবেদন প্রেরণ করিবেন।

(২) উপধারা (১) অনুযায়ী প্রাপ্ত প্রতিবেদন বিবেচনা করিয়া দেখিবার পর সরকার যদি সন্তুষ্ট হন যে, সংস্থার নিবন্ধন বাতিল করা প্রয়োজন বা সংগত, তাহা হইলে আদেশে উল্লিখিত তারিখ হইতে সংস্থাটির নিবন্ধন বাতিলের আদেশ দিতে পারিবেন।

(৩) উপধারা (২) অনুযায়ী কোনো সংস্থার নিবন্ধন বাতিল করা হইলে, নিবন্ধন বাতিলের তারিখ হইতে সংস্থাটির বিলুপ্তি ঘটিবে।

১৮। নিবন্ধিত সংস্থার স্বেচ্ছায় বিলুপ্তি-(১) কোনো নিবন্ধিত সংস্থার কার্যনির্বাহী পরিষদ বা উহার সদস্যগণ এই আইনের বিধানাবলি পরিপালন ব্যতীত উহার বিলোপ সাধন করিতে পারিবে না।

- (২) এতদুদ্দেশ্যে আহত কোনো সংস্থার সাধারণ সভায় সংস্থার মোট সদস্যের অন্যান্য তিন-চতুর্থাংশ সদস্য যদি সংস্থাটি বিলুপ্তির পক্ষে প্রস্তাব অনুমোদন করেন, তাহা হইলে সংস্থাটির সদস্যগণ কর্তৃক নির্ধারিত পদ্ধতিতে নিবন্ধন কর্তৃপক্ষের নিকট আবেদন করিতে হইবে।
- (৩) আবেদনপত্রটি পরীক্ষা করিয়া নিবন্ধন কর্তৃপক্ষ তাহার সম্বন্ধিক্রমে সুপারিশসহ সংস্থাটি বিলুপ্তির জন্য মহাপরিচালকের নিকট প্রতিবেদন প্রেরণ করিবেন।
- (৪) উপধারা (৩) অনুযায়ী প্রাপ্ত প্রতিবেদন বিবেচনা করিয়া মহাপরিচালক যদি সন্তুষ্ট হন যে, সংস্থাটির বিলোপ সাধন করা সংগত, তাহা হইলে সংস্থার নিবন্ধন বাতিলসহ বিলুপ্তির অনুমোদন প্রদান করিয়া নির্ধারিত পদ্ধতিতে আদেশ জারি করিবেন।
- (৫) উপধারা (৪) অনুযায়ী অনুমোদন করিবার পর সংস্থার কার্যনির্বাহী পরিষদ গঠনতন্ত্রের বিধান মোতাবেক সংস্থার সম্পত্তি, দাবি, দায়-দায়িত্ব নিষ্পত্তির জন্য প্রয়োজনীয় পদক্ষেপ গ্রহণ করিবেন।
- (৬) উপধারা (৫) এর অধীন প্রয়োজনীয় পদক্ষেপ গ্রহণ করিবার পর, কার্যনির্বাহী পরিষদ সংস্থার সমুদয় সম্পত্তির বিলিবন্দেজের প্রক্রিয়া বা পদ্ধতি উল্লেখ করিয়া একটি প্রতিবেদন নির্ধারিত সময়ের মধ্যে নিবন্ধন কর্তৃপক্ষের নিকট পেশ করিবেন।
- (৭) উপধারা (৬) এর অধীন প্রতিবেদন প্রাপ্তির পর নিবন্ধন কর্তৃপক্ষ সরকারি গেজেটে এই মর্মে প্রজ্ঞাপন জারি করিবেন যে, প্রজ্ঞাপন জারির তারিখ হইতে ৩ (তিন) মাসের মধ্যে কোনো দাবিদার বা পাওনাদার বা সংস্থার কোনো সদস্যের নিকট হইতে কোনো অভিযোগ পাওয়া না গেলে সংস্থাটি এই ধারার বিধানসাপেক্ষে বিলুপ্ত হইবে।
- (৮) উপরি-উক্ত ব্যবস্থা অনুযায়ী ৩ (তিন) মাসের মধ্যে কোনো অভিযোগ পাওয়া না গেলে এবং এই ধারা অনুযায়ী সমুদয় সম্পত্তির (যদি থাকে) বিলিবন্দেজ হইবার পর নিবন্ধন কর্তৃপক্ষ উপধারা (৪) অনুযায়ী আদেশ মতে সংস্থাটির চূড়ান্ত বিলুপ্তি নিশ্চিত করিয়া আদেশ জারি করিবেন এবং আদেশ জারির তারিখ হইতে সংস্থাটির বিলুপ্তি ঘটবে এবং নিবন্ধন কর্তৃপক্ষ সংশ্লিষ্ট রেজিস্টারে বিলুপ্তির তথ্য সংরক্ষণ করিবেন।

১৯। সংস্থা বিলুপ্তির ফলাফল-(১) যেইক্ষেত্রে এই আইন অনুযায়ী কোনো সংস্থার নিবন্ধন বাতিল করা হইবে, সেইক্ষেত্রে যেই তারিখ হইতে উহার নিবন্ধন বাতিল আদেশ কার্যকর হইবে, সেই তারিখে এবং সেই তারিখ হইতে সংস্থাটির বিলুপ্তি ঘটবে এবং সরকার-

- (ক) যেই ব্যাংক বা ব্যক্তির নিকট সংস্থার টাকা, ঋণপত্র বা অন্যবিধ সম্পদ রহিয়াছে, সেই ব্যাংক বা ব্যক্তিকে সরকারের লিখিত পূর্ব অনুমতি ব্যতিরেকে উক্ত টাকা, ঋণপত্র বা সম্পদ হস্তান্তর না করিবার আদেশ দিতে পারিবেন;
- (খ) সংস্থার কার্যক্রম গুটাইবার জন্য সংস্থার পক্ষে মামলা এবং অন্যবিধ আইনানুগ কার্যধারা দায়ের করিবার ও উহাতে আত্মপক্ষ সমর্থন করিবার ক্ষমতা দান করিয়া কোনো সরকারি কর্মকর্তা বা সংস্থার কোনো যোগ্য সদস্যকে নিয়োগ করিতে পারিবেন, যিনি তদুদ্দেশ্যে তাহার নিকট প্রয়োজনীয় বলিয়া বিবেচিত আদেশাবলি দান ও ব্যবস্থা গ্রহণ করিতে পারিবেন; এবং
- (গ) সংস্থার সমস্ত ঋণ ও দায় মিটাইবার পর কোনো অর্থ, ঋণপত্র, সম্পদ অবশিষ্ট থাকিলে, উহা উক্ত সংস্থার ন্যায় একই উদ্দেশ্যে প্রতিষ্ঠিত এইরূপ কোনো সংস্থাকে হস্তান্তরের জন্য আদেশ দিতে পারিবেন, যেই সংস্থার নাম আদেশে বর্ণিত হয়; এবং
- (ঘ) দফা (গ)- এর হস্তান্তর প্রক্রিয়া নির্ধারিত পদ্ধতিতে সম্পন্ন করিতে হইবে।

- (২) উপধারা (১)- এর দফা (গ) ও (ঘ) অনুযায়ী হস্তান্তরিত সম্পদ যথাযথ ব্যবহারে সংশ্লিষ্ট সংস্থা ব্যর্থ হইলে বা সরকার যুক্তিসংগত বিবেচনা করিলে দফা (গ)- এর হস্তান্তর আদেশ বাতিল করিয়া হস্তান্তরিত সমুদয় বা আংশিক সম্পদ উপধারা (৩) অনুযায়ী ব্যবস্থা গ্রহণ করিতে পারিবে।
- (৩) সরকার সংগত বিবেচনা করিলে উপধারা (১)- এর দফা (গ)- এ বর্ণিত অর্থ, ঋণপত্র, সম্পদ গ্রহণপূর্বক কোনো কল্যাণমূলক কর্মকাণ্ডে ব্যবহারের জন্য সমাজসেবা অধিদফতরের অনুকূলে ন্যস্ত করিতে পারিবে।
- (৪) উপধারা (১)- এর দফা (খ) এর অধীন নিযুক্ত ব্যক্তি কর্তৃক প্রদত্ত আদেশ, আবেদনক্রমে, সংশ্লিষ্ট এলাকার এজিয়ারসম্পন্ন কোনো দেওয়ানি আদালত কর্তৃক সেই প্রকারে বলবৎ হইবে, যেই প্রকারে ঐ আদালতে ডিক্রি বলবৎ হয়।

২০। আপিল-(১) ধারা ৬- এর উপধারা (২) অনুযায়ী নিবন্ধনের আবেদন প্রত্যাখ্যাত হইলে বা ধারা ১১ এর উপধারা (১) এর দফা (গ) অনুযায়ী নিবন্ধন নবায়ন আবেদন প্রত্যাখান করা হইলে বা ধারা ১১- এর উপধারা (১)- এর দফা (ঙ) অনুযায়ী নিবন্ধন বাতিলের আদেশের বিরুদ্ধে সংক্ষুব্ধ ব্যক্তি বা সমষ্টি বা সংস্থা কর্তৃপক্ষ নিবন্ধন কর্তৃপক্ষের আদেশের তারিখ হইতে ৩০ (ত্রিশ) দিবসের মধ্যে নিবন্ধন কর্তৃপক্ষের নিকট আপিল দায়ের করিতে পারিবেন।

(২) ধারা ১০- এর উপধারা (৪) অনুযায়ী কার্য এলাকা সম্প্রসারণের আদেশ প্রত্যাখান করা হইলে বা ধারা ১৮ অনুযায়ী কোনো সংস্থার নিবন্ধন বাতিল ও সংস্থা বিলুপ্ত হইলে মহাপরিচালকের আদেশ জারির তারিখ হইতে ৩০ (ত্রিশ) দিবসের মধ্যে সরকারের নিকট আপিল দায়ের করা যাইবে।

(৩) সরকার, ক্ষেত্রমত মহাপরিচালক নির্দিষ্ট সময়ের মধ্যে আবেদনের পরিপ্রেক্ষিতে আপিল দায়েরের জন্য আরও ৩০ (ত্রিশ) দিন পর্যন্ত সময় বৃদ্ধি করিতে পারিবেন।

(৪) সরকার, ক্ষেত্রমত মহাপরিচালক তাহার সন্তুষ্টিক্রমে প্রয়োজনে তদন্ত অনুষ্ঠানসাপেক্ষে অনধিক ৬ (ছয়) মাসের মধ্যে আপিল নিষ্পত্তি করিবেন।

(৫) সরকার, ক্ষেত্রমত মহাপরিচালক কর্তৃক প্রদত্ত আদেশ চূড়ান্ত বলিয়া গণ্য হইবে এবং নিবন্ধন কর্তৃপক্ষ কর্তৃক উহা কার্যকর করা হইবে :

তবে শর্ত থাকে যে, সংক্ষুব্ধ ব্যক্তি বা সমষ্টি বা সংস্থা কর্তৃপক্ষের উচ্চ আদালতে প্রতিকার পাইবার অধিকার ক্ষুণ্ণ হইবেনা।

২১। শাস্তির বিধান- (১) সংস্থার কোনো সদস্য বা কার্যনির্বাহী পরিষদের কোনো সদস্য যদি এই আইনের বিধান লঙ্ঘন করিয়া বা জনস্বার্থ বা রাষ্ট্রবিরোধী কার্যকলাপে জড়িত বলিয়া প্রমাণিত হয় বা এই আইন বা তদধীন প্রণীত কোনো বিধি অথবা বিধির অধীন প্রদত্ত কোনো আদেশ অমান্য করিয়া কার্যক্রম পরিচালনা করে বা ইচ্ছাকৃতভাবে এই আইনের আওতায় নিবন্ধনের আবেদনপত্রে বা নিবন্ধন কর্তৃপক্ষের নিকট পেশকৃত বা সর্বসাধারণের অবগতির জন্য প্রকাশিত কোনো সাধারণ তথ্য ও বক্তব্যে বা কোনো প্রতিবেদনে কোনো অসত্য বক্তব্য বা মিথ্যা তথ্য প্রদান করে, তাহা হইলে উক্ত ব্যক্তি বা কার্যনির্বাহী পরিষদের উক্ত সদস্য অনূন ১ (এক) বৎসরের কারাদণ্ড অথবা অনধিক ৫০০০০ (পঞ্চাশ হাজার) টাকা জরিমানা অথবা উভয় দণ্ডে দণ্ডিত হইবে।

(২) নিবন্ধন কর্তৃপক্ষ বা তৎকর্তৃক বা সরকার বা মহাপরিচালক কর্তৃক ক্ষমতাপ্রাপ্ত কোনো কর্মকর্তার লিখিত অভিযোগ ব্যতীতকোনো আদালত এই আইনের অধীন কোনো মামলা আমলে লইবে না।

(৩) নিবন্ধন কর্তৃপক্ষ কিংবা তার নিয়োজিত কোনো কর্মকর্তা কর্তৃক এই আইনের অধীন সরল বিশ্বাসে বা সং উদ্দেশ্যে প্রদত্ত আদেশের ক্ষেত্রে আদেশ প্রদানকারী কর্তৃপক্ষ বা ব্যক্তির বিরুদ্ধে কোনো আদালতে মামলা দায়ের বা অন্যবিধ আইনানুগ কার্যপদ্ধতি পরিচালনা করা যাইবে না :

(৪) এই আইন বা তদধীন প্রণীত বিধির অধীন সরল বিশ্বাসে কৃত কোনো কার্যের ফলে কোনো ব্যক্তি ক্ষতিগ্রস্ত হইলে বা ক্ষতিগ্রস্ত হইবার সম্ভাবনা থাকিলে, তজ্জন্য সরকার বা সরকারের কোনো কর্মকর্তা-কর্মচারীর বিরুদ্ধে কোনো দেওয়ানি বা ফৌজদারি বা অন্য কোনো আইনগত কার্যধারা দায়ের করা যাইবে না।

তবে শর্ত থাকে যে, ক্ষেত্রমত, কোনো ব্যক্তি আর্থিক অনিয়মের কারণে সংস্থার কর্মকর্তাদের প্রতি সংক্ষুব্ধ হলে আদালতে মামলা দায়ের করিতে পারিবে।

২২। তপশিল সংশোধন করিবার ক্ষমতা- সরকার, সরকারি গেজেটে প্রজ্ঞাপন দ্বারা সমাজকল্যাণমূলক কার্যের যে-কোনো শাখা তপশিলভুক্ত করিবার বা উহা হইতে বাদ দেওয়ার জন্য তপশিল সংশোধন করিতে পারিবেন।

২৩। অব্যাহতি প্রদানের ক্ষমতা- সরকার, সরকারি গেজেটে প্রজ্ঞাপন দ্বারা কোনো সংস্থা বা সংস্থার শ্রেণি বিশেষকে এই আইনের সকল বা কোনো বিশেষ বিধানের কার্যকারিতা হইতে অব্যাহতি প্রদান করিতে পারিবেন।

২৪। ক্ষমতা অর্পণ- সরকার, সরকারি গেজেটে প্রজ্ঞাপন দ্বারা এই আইনের অধীন কোনো ক্ষমতা সাধারণভাবে বা প্রজ্ঞাপনে উল্লিখিত শর্তে উহার যে-কোনো কর্মকর্তার নিকট অর্পণ করিতে পারিবেন।

২৫। বিধি প্রণয়নের ক্ষমতা- এই আইনের উদ্দেশ্য পূরণকল্পে সরকার, সরকারি গেজেটে প্রজ্ঞাপন দ্বারা এই আইনের সহিত



অসামঞ্জস্যপূর্ণ নহে এইরূপ বিধি প্রণয়ন করিতে পারিবে।

তবে শর্ত থাকে যে, বিধি প্রণীত না হওয়া পর্যন্ত সরকার প্রয়োজনে, সাধারণ বা বিশেষ আদেশ দ্বারা এই আইনের সহিত সামঞ্জস্যপূর্ণ হওয়া সাপেক্ষে, যে-কোনো কার্যক্রম গ্রহণ ও সম্পাদন সম্পর্কে নির্দেশ প্রদান করিতে পারিবে।

২৬। নির্বাহী আদেশ জারি- এই আইনের উদ্দেশ্য পূরণকল্পে, সরকার, প্রয়োজনে, সময় সময় নির্বাহী আদেশ জারি করিতে পারিবে।

২৭। অস্পষ্টতা দূরীকরণ-এই আইনের কোনো বিশেষ বিধান কার্যকর করিবার ক্ষেত্রে কোনো অস্পষ্টতা দেখা দিলে সরকার, সরকারি গেজেটে প্রজ্ঞাপন দ্বারা এই আইনের বিধানাবলির সহিত সংগতিপূর্ণ হওয়া সাপেক্ষে, উক্তরূপ অস্পষ্টতা দূর করিতে পারিবে।

২৮। রহিতকরণ ও হেফাজত-

- (১) 'স্বৈচ্ছাসেবী সমাজকল্যাণ সংস্থাসমূহ (রেজিস্ট্রেশন ও নিয়ন্ত্রণ) অধ্যাদেশ, ১৯৬১ (১৯৬১ সালের ৪৬ নং অধ্যাদেশ) এতদ্বারা রহিত করা হইল;
- (২) উক্তরূপ রহিতকরণ সত্ত্বেও, উক্ত অধ্যাদেশ এর আওতায় যেইসকল কার্যক্রম নিষ্পন্ন হইয়াছে তাহা এই আইনের অধীনে সম্পন্ন হইয়াছে বলিয়া গণ্য হইবে এবং এই আইন জারির তারিখে অনিষ্পন্ন কার্যাদি যতদূর সম্ভব এই আইনের অধীন নিষ্পন্ন করিতে হইবে।

২৯। ইংরেজিতে অনূদিত পাঠ প্রকাশ- এই আইন প্রবর্তনের পর সরকার, সরকারি গেজেটে প্রজ্ঞাপন দ্বারা, এই আইনের বাংলা পাঠের ইংরেজিতে অনূদিত একটি নির্ভরযোগ্য পাঠ (Authentic English Text) প্রকাশ করিতে পারিবে :  
তবে শর্ত থাকে যে, বাংলা পাঠ ও ইংরেজি পাঠের মধ্যে বিরোধের ক্ষেত্রে বাংলা পাঠ প্রাধান্য পাইবে।

তপশিল {ধারা ২ (৭) দ্রষ্টব্য}

- (০১) শিশুকল্যাণ ও উন্নয়ন ;
- (০২) প্রতিবন্ধী ব্যক্তিদের কল্যাণ ও উন্নয়ন ;
- (০৩) নারীকল্যাণ ও উন্নয়ন ;
- (০৪) প্রবীণ কল্যাণ ও পুনর্বাসন ;
- (০৫) আইনের সংস্পর্শে আসা শিশু এবং আইনের সংঘাতে জড়িত শিশুদের কল্যাণ ও উন্নয়ন ;
- (০৬) যুবকল্যাণ ও উন্নয়ন ;
- (০৭) কারামুক্ত কয়েদিদের কল্যাণ, উন্নয়ন ও পুনর্বাসন ;
- (০৮) ভবঘুরে ও নিরাশ্রয় ব্যক্তিদের কল্যাণ, উন্নয়ন ও পুনর্বাসন ;
- (০৯) দীর্ঘস্থায়ী শারীরিক ও মানসিক রোগীদের কল্যাণ, উন্নয়ন ও পুনর্বাসন ;
- (১০) ছাত্রকল্যাণ ;
- (১১) পরিবারকল্যাণ।
- (১২) দুর্বোগ প্রস্তুতি এবং ব্যবস্থাপনা ;
- (১৩) স্বাস্থ্য শিক্ষা/স্বাস্থ্য সেবা/ স্বাস্থ্য গবেষণা ;
- (১৪) পরিবেশ সংরক্ষণ ও পুনরুদ্ধার, সামাজিক বনায়ন এবং বনায়ন ;
- (১৫) সামাজিক গবেষণা, সাংস্কৃতিক অনুশিক্ষা এবং মূল্যায়ন ;
- (১৬) সমাজ বিরোধী কার্যকলাপ হইতে জনগণকে বিরত রাখিবার উদ্দেশ্যে চিত্তবিনোদনমূলক কর্মসূচি ;
- (১৭) নাগরিক দায়িত্ববোধ জাগ্রত করিবার উদ্দেশ্যে সামাজিক শিক্ষা, বয়স্ক শিক্ষা ;
- (১৮) মাদকাসক্তদের চিকিৎসা ও পুনর্বাসন ;
- (১৯) প্রান্তিক অঞ্চলের ও সুবিধাবঞ্চিত জনগোষ্ঠী বা জনসমষ্টির কল্যাণ, উন্নয়ন ও পুনর্বাসন।

(২০) পশু পালন/হাঁস-মুরগি পালন/মৎস্য চাষ/মৌ-চাষ/রেশম চাষ ইত্যাদি ;
(২১) সামাজিক ও জনসংগঠনের উন্নয়ন বা জনগণের যে-কোনো অংশের বা শ্রেণির কল্যাণ ;
(২২) কৃষি ও কৃষক উন্নয়ন ;
(২৩) পানি সম্পদ উন্নয়ন ;
(২৪) পাঠাগার, সাংস্কৃতিক এবং বিনোদনমূলক কর্মকাণ্ডের সৃজন বা উন্নয়ন ;
(২৫) স্থায়িত্বশীল ভূমি ব্যবহার, ভূমি সংরক্ষণ ও ভূমি উন্নয়ন ;
(২৬) সংবিধান ও আইন স্বীকৃত অধিকারসমূহের সংরক্ষণ এবং উন্নয়ন ;
(২৭) আইনগত শিক্ষা ও সহায়তা ;
(২৮) গণতান্ত্রিক মূল্যবোধ সম্পর্কে সচেতনতা সৃষ্টি এবং নির্বাচন পর্যবেক্ষণ ;
(২৯) সমাজকল্যাণ সম্পর্কিত বিভিন্ন বিষয়ে এ্যাডভোকেসি ;
(৩০) সমাজকল্যাণ কার্যে প্রশিক্ষণ ;
(৩১) সমাজকল্যাণ সংস্থাসমূহের সমন্বয় সাধন ।